

UJIAN MENDENGAR
[30 markah]

CONTOH BAHAN AUDIO**CONTOH 1**

Anda diberi masa selama satu minit untuk membaca soalan.

Dengar petikan cerpen berikut dengan teliti dan jawab soalan-soalan yang diberikan.

Cerpen Kasut Kelopak Jantung

“Kasut sekolah tak pakai, baju sukan tak bawa! Apa nak jadi dengan kamu ini?” leter Cikgu Harun setelah melihat Ahmad hanya diam membantu.

Tiba-tiba Cikgu Harun terpandang rumpun pisang merimbun di tepi pagar sekolah. Di bawahnya bertaburan kelopak jantung yang gugur. Besar-besar dan berwarna merah hati. Cikgu Harun memungut kelopak jantung itu lalu kembali ke tempat Ahmad sedang berdiri. Seperti menanti hukuman gurunya.

“Pergi cari tali!” arah Cikgu Harun kepada Ahmad. Murid itu tidak berkata apa-apa. Dia terus beredar ke arah kantin sekolah. Sebentar kemudian dia kembali dengan seutas tali rafia berwarna merah.

“Kamu pakai benda ini. Ikat elok-elok!” Cikgu Harun memberikan perintah. Jarinya dituding tepat ke arah kelopak jantung pisang. Ahmad memandang kosong ke wajah Cikgu Harun seperti mahu meminta simpati.

“Jangan buka kasut ini selagi kamu tidak beli kasut baru!” Cikgu Harun memberikan amaran. Ada sedikit perasaan lucu di dalam hati Cikgu Harun melihat anak murid yang tidak dikenali latar belakang itu. Kadang-kadang dilihatnya Ahmad seperti lurus bendul. Dia tidak pernah membantah kata-kata guru. Katalah apa sahaja, dia tetap patuh tanpa banyak soal. Jauh sekali ponteng sekolah. Walaupun berkaki ayam, Ahmad tidak pernah ponteng. Itulah kelebihan Ahmad. Kegigihannya memang ketara. Cikgu Harun turut menyadarinya.

Anda diberi masa tiga puluh saat untuk menyemak jawapan.

Petikan cerpen akan dibaca sekali lagi.

Anda diberi masa selama satu minit untuk membaca soalan.

Dengar maklumat berikut dengan teliti dan jawab soalan-soalan yang diberikan.

Petikan yang sama diperdengarkan(Petikan Cerpen)

Anda diberi masa tiga puluh saat untuk menyemak jawapan.




CONTOH ITEM (PETIKAN CERPEN)

Jawab soalan-soalan berikut berdasarkan petikan cerpen yang diperdengarkan

1. Nyatakan **satu** tindakan Ahmad yang menyebabkan Cikgu Harun marah. [2 markah]
-

2. Nyatakan sifat kelopak jantung yang gugur bertaburan. [1 markah]



3. Apakah tujuan Cikgu Harun menyuruh Ahmad mencari tali rafia? [2 markah]
-

4. Apakah nilai murni yang dimiliki oleh watak Ahmad? [2 markah]
-

Bulatkan jawapan yang betul bagi soalan 5.

5. Berikut merupakan perwatakan Ahmad kecuali

- A. gigih
- B. penyayang
- C. taat kepada guru
- D. tidak pernah ponteng sekolah

[1 markah]



CONTOH 2

Anda diberi masa selama satu minit untuk membaca soalan.

Dengar petikan syarahan berikut dengan teliti dan jawab soalan-soalan yang diberikan.

Faedah Membaca Buku

Salam sejahtera saya ucapkan kepada yang dihormati Tuan Pengerusi Majlis, Tuan Pengetua, para hakim, guru-guru dan rakan seperjuangan yang dihormati. Syarahan yang ingin saya sampaikan pada hari ini bertajuk ‘Faedah Membaca Buku’.

Hadirin yang dihormati,

Membaca merupakan satu amalan yang dapat memanfaatkan diri kita. Amalan ini harus diamalkan setiap hari kerana dengan membaca kita dapat menambah pengetahuan tentang sesuatu perkara yang tidak kita ketahui. Oleh itu, kita tidaklah dianggap seperti katak di bawah tempurung. Selain itu, kita dapat membaiki dan menguasai kemahiran berbahasa kita menerusi amalan membaca buku. Dalam aspek bahasa, perbendaharaan kata kita akan bertambah dan penguasaan kata menjadi lebih kukuh. Dengan adanya amalan membaca ini, masa lapang kita boleh diisi dengan aktiviti yang berfaedah.

Selain mendapat pengetahuan baharu, kita juga dapat mengelakkan diri daripada terlibat dengan gejala negatif. Akhir sekali, membaca akan membantu kita menilai dan membezakan sesuatu perkara sama ada baik atau buruk. Apabila kita banyak membaca, orang lain tidak dapat memperdaya kita kerana kita serba tahu. Kesimpulannya, membaca sememangnya memberikan banyak faedah kepada kita. Oleh itu, amalan ini perlulah dipupuk sejak kecil lagi.

Sekian, terima kasih.

Anda diberi masa tiga puluh saat untuk menyemak jawapan.


Petikan syarahan akan dibaca sekali lagi.

Anda diberi masa selama satu minit untuk membaca soalan.

Dengar maklumat berikut dengan teliti dan jawab soalan-soalan yang diberikan.

Petikan yang sama diperdengarkan(Petikan Syarahan)

Anda diberi masa tiga puluh saat untuk menyemak jawapan.



CONTOH ITEM (PETIKAN SYARAHAN)

Jawab soalan-soalan berikut berdasarkan petikan syarahan yang diperdengarkan.

Bulatkan jawapan yang betul bagi soalan 1.


1. Peserta menyampaikan ucapan salam dan kata alu-aluan kepada pendengar berikut **kecuali**,
 A. pengetua
 B. para hakim
 C. guru-guru
 D. ibu bapa *[1 markah]*

2. Nyatakan peribahasa yang terdapat dalam petikan syarahan tersebut? *[2 markah]*
-

3. Selain menambahkan perbendaharaan kata, apakah faedah lain amalan membaca dalam aspek bahasa? *[2 markah]*
-

Bulatkan jawapan yang betul bagi soalan 6.

4. Lengkapkan ruang kosong berkenaan **format syarahan**.



- A. Kata sapaan
- B. Kata alu-aluan
- C. Kata penghadap
- D. Kata panggilan hormat

[1 markah]

